

BIBIČKA VODA

Ova zvijezda je u znaku vode. Voda je neophodna za rast bambusa i drugih biljaka. Ona teče mirno, ali ponekad i živahno. Mirne ili živahne prirode su i ljudi rođeni pod ovom zvijezdom. Njihova priroda je promjenjiva, kao što je i vodeni tok. Oni su prilagodljivi, lako ulaze u različita društva, kao što voda uđe i u najmanju pukotinu i prolaz. Mekog su karaktera, društveni i ne pokazuju drugima svoje osjećaje ako mnogo pate. Ovi ljudi obično nemaju mnogo sreće do 35. godine svoga života i u mladosti se pred njima nađe popriličan broj prepreka. Oni ipak mogu mnogo da pretrpe i sačekaju period mirnijeg i harmoničnijeg života koji dolazi poslije tridesetpete.

Čak i kad imaju mnogo talenata i znanja, dok su mladi, ljudi iz okoline, ne obraćaju pažnju na njih i ne daju im zaslužen priznanje. Kao što voda dok teče postaje sve bujnija i na kraju se ulije u veliki ocean, tako i oni na kraju, u zrelijem dobu života najzad dožive veliko priznanje i sreću. Ljudi rođeni pod ovom zvijezdom u mladosti često moraju da rješavaju probleme svojih roditelja, starije braće i sestara te drugih članova porodice. Oni u to vrijeme najviše čeznu za slobodom i vremenom da se bave svojim poslovima, ali zbog obitelji upadaju iz teškoće u teškoću i time nemaju nikada dovoljno vremena za sebe. Ipak, dovoljno su strpljivi da sve to izdrže i u zreloj dobi za sve napore im stiže nagrada. Zbog ovih dobrih osobina uvijek su omiljeni u okolini u kojoj žive.

